

四庫全書

集部

欽定四庫全書

集部

忠肅集卷十二

附錄

詳校官編修_臣翟槐

中書_臣劉源濟覆勘

總校官檢討_臣何思鈞

校對官主事_臣陳墉

膳錄監生_臣王涵

欽定四庫全書

忠肅集卷十一

明于謙撰

雜體

擬古

妾意如冰清妾心如石堅良人久別離悵望空懸懸所
感恩義重豈為情欲牽但願良人好功名遂超遷九重
布恩澤四境無烽煙未卜會面期先遣佳音傳亦足慰
岑寂何必常團圓

南國有佳人

南國有佳人皎皎冰雪姿恒恐污潔白
臙粉弗敢施奉身事君子服勤忘燕私
一朝成遠別千里長相思願托雙飛翼
辛苦良不辭飛來侍君側恩義兩無虧
永言執箕帚盡瘁以為期可望不可即
翹首空嗟咨

遊春曲

垂楊拂地如青絲輕盈不奈東風吹
馬上誰家游俠兒雕鞍玉勒黃金羈
張弓放彈如星馳正中流鶯落樹枝

衆中大笑稱絕奇揚鞭走馬當路岐忽聞鞦韆笑語嬉
隔牆竚立情如癡牆裏佳人顰黛睂留情不語知伊誰
分明相望不相知恨無羽翼通佳期夕陽啼鳥催分離
可憐兩地空相思

春晝曲

東風吹花花不定紅雨紛紛落芳徑喚人啼鳥隔紗窗
巧語關情誰忍聽柔腸百結苦縈回却似丁香花未開
花開花謝年年事可惜流光如箭催門外紅塵飛紫陌

陌上垂楊弄春色垂楊只解送行人不管行人歸未得
採桑婦

低樹採桑易高樹採桑難日出採桑去日暮採桑還歸
來喂葉上蠶箔誰問花開與花落二眠纔起近三眠此
際祇愁風雨惡割雞裂紙祀蠶神蠶若成時忘苦辛但
願公家租賦給一絲不望上儂身丁男幸免官府責脂
粉何須事顏色收蠶猶未是閒時却共兒夫勤稼穡

採蓮曲

朝採蓮暮採蓮蓮花豔冶蓮葉鮮花好面顏不常好葉
似羅裙怨秋早秋風浩蕩吹碧波綠怨紅愁將奈何年
年採蓮逞顏色採得蓮花竟何益蓮花雖好却無情夫
婿有情常是客常是客萬里關河歸未得爭如池上錦
鴛鴦雙去雙來到頭白採蓮復採蓮採蓮長可憐願比
蓮花與蓮葉不論生死根株連

楊花曲

垂楊飛白花飄飄萬里去多情蜂蝶亂追隨不問依棲

向何處人生漂泊無定蹤一似楊花趁暖風今朝馬足
西邊去明日車輪又向東可憐不識歸來路一去江山
千萬重楊花本是無情物懊惱人生在客中

遠別離

遠別離何時歸出門子女爭牽衣借問此行向何處底
事欲留留不住父子恩情深更深可憐不得恒相聚遠
別離無限愁山行騎馬水乘舟行人一去蚤回頭

折楊柳

折楊柳折得柔條持在手慙慙贈與遠行人人去書來
莫厭頻明年柳發黃金芽却望歸轅早到家春來春去
須臾事莫待漫天飛雪花折楊柳愁思多短長亭畔崎
嶇路送盡行人奈爾何

靜夜思

靜夜思何時休終宵展轉聽更籌人生由來不滿百安
得朝夕事隱憂功名富貴倘來物目前渺渺春雲浮甲
第歌鐘萬戶侯五花駿馬千金裘春風秋月不相待倏

忽朱顏變白頭豪華一去難再得壯氣銷沉土一丘但
令名節不墮地身外區區安用求靜夜思誰與謀勸君
高枕且熟睡窮達由天不用愁

漁父辭

水深得魚多水淺得魚少人間徑路漫崎嶇天際煙波
長浩渺山妻稚子幸團圓百歲生涯共一船收綸罷釣
晚風前楊柳穿魚當酒錢酒酣日暮船頭宿醒看江水
捧團玉浩歌一曲寫幽情欸乃聲中山水綠山水綠快

我心船頭有魚可換酒莫管興亡與古今

節婦吟

淒涼復淒涼世間好事難久長月圓無奈陰雲蔽花發
愁看風雨狂良人恩愛中道絕秋月春花空斷腸空斷
腸心不移玉潔冰清天自知翁姑老病兒嬌癡蕭然四
壁無遺貲辛勤紡績事家業暮暮朝朝顰黛眉但願翁
姑無恙兒成立獨抱窮愁甘受饑甘受饑淚成血九原
無路見良人縱有衷情向誰說

出塞

健兒馬上吹邊笳
旌旗五色如雲霞
紫髯將軍掛金印
意氣平吞瓦剌家
瓦剌蕃人手弓矢
敢向邊疆撓赤子
雲屯雨散去復來
大荒落日風塵起
將軍出塞整戎行
十萬戈矛映雪霜
左將纔看收部落
前軍又報縛戎王
羽書捷奏上神州
喜動天顏寵數優
不願千金萬戶侯
凱歌但願蚤回頭

入塞

將軍歸來氣如虎十萬貔貅爭鼓舞凱歌馳入玉門關
邑屋參差認鄉土弟兄親戚遠相迎擁道攔街不得行
喜極成悲還墮淚共言此會是更生將軍令嚴不得住
羽書催入京城去朝廷受賞却還家父子夫妻保相聚
人生從軍可奈何歲歲防邊辛苦多不須更奏邊笳曲
請君聽我入塞歌

採蓮曲

日出採蓮去日暮採蓮歸蓮花如面葉如衣船頭對對

鴛鴦飛鴛鴦飛入花深處交頸綢繆無限趣覩物關情
可奈何扣舷齊唱採蓮歌採蓮歌未休心中無限愁如
何得似鴛鴦鳥雙去雙來到白頭

北風吹

北風吹吹我庭前柏樹枝樹堅不怕風吹動節操稜稜
還自持冰霜歷盡心不移況復陽和景漸宜閒花野草
尚歲蕤風吹柏樹將何為北風吹能幾時

春風吟

夕陽欲落還未落垂楊拂地東風惡東風雖惡還有情
歲歲能令芳草生草生滿地綠侵衣時見堦前蛺蝶飛
却怪東風無氣力春深不解動芳菲

春日吟

東風浩蕩吹花柳春氣薰人如醉酒草生滿地綠敷茵
桃李無言也笑人年年常是客底事欲歸歸未得
歸未得可奈何太行南北千條路不似離腸宛轉多

眼前花

昨日看花開今朝看花落花開花落兩無情莫怪夜來
風雨惡人生一似雨中花老少須臾莫怨嗟昨日朱顏
生綠醕今朝白髮暎烏紗看花對酒寧辭醉醉醒後還投
賣酒家君不見眼前花

落花吟

昨日花開樹頭紅今日花落樹頭空花開花落尋常事
未必皆因一夜風人生為樂須少年老後看花亦可憐
典衣沽酒花前飲醉掃落花鋪地眠風吹花落依芳草

翠點臙脂顏色好韶光有限蝶空忙歲月無情人自老
眼看春盡為花愁可惜朱顏變白頭莫遣花飛江上去
殘紅易逐水東流

田舍翁

田舍翁老更勤種田何曾辭苦辛雞皮鶴髮十指禿日
向田間畊且斲雨暘時若得秋成敢望肥甘充口腹但
願公家無負租免使兒孫受凌辱吏不敲門犬不驚老
稚團圞貧亦足可憐憔悴百年身暮暮朝朝一盂粥田

金八
卷十一
舍翁君莫欺暗中脫剝民膏脂人雖不語天自知

醉時歌

酒滿金盆泛綠波主人半醉朱顏酡請君且就坐聽我
醉時歌人生天地間一葦浮江河富貴與功名倏忽浮
雲過牀頭有酒且須斟囊裏無錢不用尋錢多自古壞
名節酒量何妨江海深劉伶好酒稱世賢李白騎鯨飛
上天石崇元載極奢侈至今千載遺腥羶勸君滿飲不
須辭萬事由天莫怨咨蛟龍變化非無日鴻鵠翱翔自

有時醉時歌歌有節酒闌客散我還醒却上高樓對明
月

獨酌

東風昨夜吹芳草綠漸成陰紅漸老庭前無數落來花
分付家童莫輕掃開樽獨酌向花前仰面歌呼聲徹天
花殘自有重開日人老何由更少年醉看明月照華顛
還把落花鋪地眠牀頭貯酒三百斛囊底蕭條無一錢
看花對酒且自樂一任春歸啼杜鵑

採桑婦

出門行採桑路逢游冶郎君馬上笑相問問儂何事
不梳粧妾云本是農家婦辛苦從夫立門戶自來不解
施朱鉛但識荆釵與裙布郎君問妾妾不疑笑殺無端
輕薄兒妾顏如花心似鐵玉潔冰清天自知世間萬物
不得齊或清如水濁如泥請君前行不須問好把絲鞭
促馬蹄馬蹄追風去若箭儂家掩袂淚如霰出門明日
更相逢郎君避路羞相見

馬上郎

馬上郎青春好玉勒金羈映芳草
芳草茸茸襯落花
花間亭館知誰家
郎君下馬入門去
紅裙翠裊留春住
留春住可奈何
笑語生香歡愛多
烏雲高髻鬱嵯峨
樽前起舞影婆娑
酒酣漸覺朱顏酡
留情兩眼橫秋波
橫秋波情密密
閭閻凍餒君不知
夫妻對面厨中泣

處世若醉夢

處世若醉夢憂樂付等閒
百事皆前定對酒且自寬
仰

天歌鳴鳴清風吹我冠濁醪滿瓦缶苜蓿堆春盤無人
勸我飲自酌還自歡醉眠白日晚起看明月團拔劍舞
中庭浩歌振林巒丈夫意如此不學腐儒酸

落花吟

東風吹落花點點依芳草多情還似未開時分付家僮
莫輕埽埽却明朝又落來來年依舊見花開莫因開落
分憂喜且向花前飲一杯

古意

妾顏如花命如葉嫁得良人傷遠別別來獨自守空閨
夜夜焚香拜明月月缺重圓會有期人生何得久別離
願將身托蟾蜍影照見良人不寐時

初日出東方光彩照八極飛潛及蠢動咸仰生成力我
願天宇清浮雲埽形迹庶俾陽德亨萬古明不息

從軍五更轉

一更新月出城上箭初傳將軍號令急不敢倒頭眠
二更天氣冷孤月照三軍誰奏邊笳曲淒涼不忍聞

三更霜漸落城上聽寒雞仰面看星象天空北斗低
四更城上望滿野是新霜衣薄弓刀冷那能不憶鄉
五更人盡起鼓角動邊城聞道將軍令平明要起營

圓明偈

明月無罣礙皎然在虛空恒河沙世界照耀一般同

大風

大風振林木萬葉皆飛颺如何頃刻間景物殊炎涼感
之欲太息凭闌對斜陽東籬有黃菊歸來嗅餘香

鯉魚圖

海波拍天流海日當天起神魚大如舟揚鬣復鼓尾
嶸頭角信非難變化飛騰頃刻間等閒吸盡四海水
化作商霖拯旱乾

閨思

東風蕩漾吹花柳春色醺人如醉酒梁間喜見燕將雛
檻外忽聞鶯喚友綠窗倦繡且停針搔首沉吟意轉深
却喚侍兒開繡戶輕移蓮步傍花陰花陰滿地蝶雙飛

相隨戀戀紅薔薇欲向花間撲雙蝶生憎綠刺牽人衣
歸來長嘆臨粧鏡宛轉柔情還未定還未定誰得知須
與鴉噪庭槐晚又是深閨拜月時

夏日憶故鄉風景

石榴樹底紅巾盛薔薇枝頭露香玉薰風拂拂自南來
時向高堂埽炎燠湘簾半捲日遲遲竹陰參差柳陰綠
紅綃煥爛蜀葵開金彈纍垂盧橘熟端陽佳節競繁華
角黍堆盤暎醺醑一從遊宦隔天涯馬首紅塵厭驅逐

有時飛夢繞錢塘此景依然在心目今年夏月居晉陽
南北風土殊炎涼清和已過近五月草木猶自愁飛霜
故園物候不可見塵沙塞草空茫茫雲山望斷幾千里
小樓盡日空徜徉

讀易

太極本無形陰陽互消長庖犧百王先作易原俯仰卦
畫以一陳人文日宣朗文王系卦辭吉凶指諸掌周孔
更發明此道該穹壤濂溪論理微康節推數廣程朱述

傳義明白非惚恍半夜一聲雷千門忽然敞月窟與天
根乘風恣來往焚香誦帝編悠然動遐想

清明感興

宦遊無定踪飄飄任南北今年在并州邂逅過寒食花
枝紅欲燃草色翠如織羣鳥鳴閒庭啾啾竟朝夕飛絮
隨東風輕盈粘几席而我與春光相看俱是客春歸已
有期我歸應未得對景不成歡喟然長太息太息復何
為揮毫題素壁

入春狂風大作加以久無雨雪因以自咎

朔風怒號不得止漠漠埃塵漲天起入春已是一旬餘
翻覺貂裘薄如紙前朝飛雪天上來間積郊原不盈指
壠間宿麥正青青無雨安得勃然起聖皇愛民如赤子
詔旨丁寧在人耳輕徭薄賦更恤刑天意云何乃如此
撫循失政固予罪竊祿偷安心獨愧願移災咎及余躬
免使蒼生受憔悴

暇日命僕於盆池養魚瓦缶種穀以觀生意

盆池養魚缶種穀魚自悠然穀還綠缶中生意亦流通
盆池江湖非局促乾坤二氣本無私高下洪纖均化育
放魚入海化為龍移穀在地收萬鍾龍飛九天雨萬國
穀布下土蘇羣農乃知此物有神化世間大小無不容

晝夜長短

晝夜分長短氣候互涼燠晝長宜官府夜短省鎗燭鎗
燭民膏脂燃之非我欲無奈更漏長欲眠還反復起坐
向燈前中心如轉轂或將既往追或將未來續兵民當

懷綏邊境宜儲蓄化何由而行政何由而肅思之有未
得還將舊書讀臧分所當為一一在心目夜分方就枕
展轉猶未足奴隸不得眠偶語向廚屋為此非好勞庶
以償俸祿自從春晝長百事免拘束冠蓋臨高堂咨詢
盡民俗貧者為寬征饑者為發粟善良加撫摩豪強使
懾服閭里無橫科倉廩有餘穀簡教厲兵戎公勤披案
牘訴牒旁午來剖斷不留宿雖非霹靂手遇事頗神速
退食時從容吟詩對脩竹夜後即安眠何須論榮辱民

財免耗傷奴隸無怨讟此事良自知誰能喻衷曲

慈訓堂詩

有序

母坤道也以養育為德而主乎慈故為母者未始不
慈其子慈而能訓者蓋少訓而能底于成者尤不多
見也四明王原之母夫人舜江張天民先生女也予
髫年時識先生高古脩潔與人不苟合長於詩尤工
於楷法雖尋常製作若不經意思而人自以為不可
及蓋天姿俊邁問學充裕使然也觀先生則夫人之

賢可知矣夫人蚤適原之父金溪令中歲孀居守節
厲志篤於訓誨諄諄然勉諸子以力學而諸子克遵
厥訓底于有成既而原之以校官起家超拜監察御
史擢叅山西藩政清慎明決卓然有稱季復登進士
第授秋官尚書郎餘雖未仕亦皆脩謹力學為鄉里
聞人是皆平日訓誨所致原之推本所自而扁其堂
曰慈訓所以表夫人之懿行而示若子若孫於無窮
也大宗伯兼翰林學士楊先生與詞林諸耆舊皆為

文以識之矣間嘗徵余言余嘉夫人之善於教子而
原之昆季又能不負其所教世之為母子者將於是
而取則焉斯堂之作豈直為觀美哉因為詩以歌之
君不見孟軻稱大賢道學冠今古陶侃惜分陰乃心忠
典午當年造就賴慈親翦髮斷機良獨苦君家阿母貞
且賢與古列女相比肩孀居節操凜冰雪諸孤在膝皆
髫年諄諄訓誨不輟口願汝成立報所天為言汝家素
閭閻累葉簪組相蟬聯而翁受命宰百里奉法循理

人共傳一朝奄棄遺爾輩我故未忍歸重泉屬續言
猶在吾耳令我慇懃教諸子汝曹力學能有成爾父
雖死猶不死言之痛心恐未足大書日新扁華屋諸
郎感奮思立身恒若湯盤警心目明師益友資討論
暮史朝經勤講讀一朝昆季俱登庸萬里雲霄快鴻
鵠伯也繡衣霄漢立季也芳名題桂籍子能若此親
何憂笑引諸孫餉梨栗滿庭慈竹布清陰繞砌萱花
麗遲日

憫農

無雨農怨咨有雨農辛苦農夫出門荷犁鉏村婦看家
事縫補可憐小女年十餘赤腳蓬頭衣藍縷提筐朝出
暮始歸青菜挑來半沾土茅簷風急火難吹旋熟山柴
帶根煮夜歸夫婦聊充饑食罷相看淚如雨淚如雨將
奈何有口難論辛苦多嗟爾縣官當撫摩

收麥詩

大麥收割蚤二麥收割遲帶青摘穗不候熟老稚藉此

聊充饑去年夏旱秋又水穀麥無收民受餒今年種麥
十二三縱有收成無積累了却官租餘幾何女嫁男婚
債負多公私用度皆仰給可喜時清無重科有司牧民
當體此愛養蒼生如赤子庶令祿位保始終更有清名
播青史剝民肥已天地知國法昭昭不爾私琴堂公暇
垂簾坐請誦老夫收麥詩

喜雨行

夏田得雨苗青青秋田得雨容易畊夏田秋田俱得雨

農家不用愁收成收成有望人心悅四方萬國騰歡聲
嗟予菲才忝巡撫慙無德澤被蒼生但願風調雨順民
安業我亦走馬看花歸帝京

夏夜步月

明月入我戶清風吹我衣散步下瑤階仰看星斗輝萬
籟寂不聞羣動咸息機嘯歌振林藪鳥雀爭分飛興盡
卻歸來此意知者稀

酒凍戲題

我有一罇酒欲酌誰與共置之向牀頭僮僕不敢動歲暮天苦寒忽然結成凍開罇撫掌笑有物必有用更添麴藥作酸醢飽茹黃虀三百甕

無題

人生不滿百常為千歲計圖利與求名昂昂爭意氣晝營夜復思顧恐力弗至一旦壽命終萬事皆委棄卓哉陶靖節不為世故累解印歸柴桑清風滿天地樽中幸有酒自酌還自醉借問懷中人誰能會此意

自嘆

我生四十餘已作十年客百歲能幾何少壯難再得今
朝太行南明日太行北風雪敝貂裘塵沙暗金勒寒暑
互侵凌凋我好顏色齒牙漸搖脫鬚髮日以白位重才
不充況此遲暮迫為上乏勲勞為下無德澤揣分宜退
休非惟慕竒特蚤賦歸去來庶免清議責

夜聞鶴唳有感

齋居無四隣庭空篆煙冷明月揚素輝脩篁散疎影雙

鶴向我鳴鼓翅復引領靈風振縞衣露華浥丹頂清響徹雲霄萬籟悉以屏芝田在何許遙遙隔塵境欲去還未能蹉跎駐光景聽此融心神令人發深省

梅花圖為嚴憲副題

我家住在西湖曲種得梅花遶茅屋雪消風暖花正開千樹瓏璵綴香玉有時抱琴花下彈有時展易花前讀浩然清氣滿乾坤坐覺心胸絕塵俗一從遊宦來京師幾度梅花入夢思為君展卷題詩處還憶開窗對月時

醉墨淋漓染毫素筆底生春若神助調羹鼎鼐愧無功
何時卻踏西湖路

無題

朝在太行南暮在太行北問余何事苦怱怱鞍馬驅馳
常是客筵而不答心自知眷戀浮名好是癡昨日朱顏
如殢酒今朝白髮已成絲遠離鄉國空勞夢悵望庭闈
有所思君寵親恩俱未報竊祿無功補盛時太行山不
可攀誰似山頭白雲好纔成霖雨便知還

雨後寫懷

甘雨洗塵寰爽氣滌煩襟參差庭前樹蒼蔚敷繁陰
凱風泠然來好鳥送佳音俯瞰池塘水粼粼清且深
中有雙鯉魚隨波恣浮沉覩茲節物佳擊節動謳吟
萬事毋足論大化契我心

池邊散步

臨流樹影半欹斜晴波滉漾走金蛇簾前燕子掠飛蝶
池面魚兒吹柳花游絲牽風白日靜落紅滿地青春賒

數聲啼鳥助幽興門巷彷彿山人家

無題

名節重泰山利欲輕鴻毛所以古志士終身甘緼袍胡
椒八百斛千載遺腥臊一錢付江水死後有餘褒苟圖
身富貴脫剝民脂膏國法縱未及公論安所逃作詩寄
深意感慨心忉忉

篝燈夜窗下撫卷坐來久泛觀古豪傑際遇良不偶伊
周及房杜股肱戴元首韓范與富歐麴蘖成醴酒勲業

正當時功名垂弗朽李廣命不侯馮唐空白首間關逐
常調遇事亦掣肘賦命有疾徐奔競適足醜掩書對明
月且盡杯中酒

寄內

結髮為夫妻恩愛兩相好生男與育女所期在偕老我
生叨國恩顯宦亦何早班資忝亞卿巡撫歷邊徼自愧
才力薄無功答穹昊勉力效驅馳庶以贖天討汝居輦
轂下閨門日幽悄大兒在故鄉地遠音信杳二女正嬌

癡但索梨與棗況復家清貧生計日草草汝惟內助勤
何曾事溫飽而我非不知報主事非小忠孝世所珍賢
良國之寶尺書致慇懃此意諒能表歲寒松栢心彼此
永相保

憶老婢

吾家有老婢行年近五十雖云極醜陋所幸少過失我
昔少年時垂髻髮如漆銳意取功名辛苦事紙筆雙親
命老婢給使讀書室余時方氣剛未知撫愛術斯須不

如意罵詈信口出老婢受不辭未始怨且泣我壯忝科
名旋登顯要職老婢亦欣慰且言所願畢家人自南來
致意我家室此意久未報吾心恒鬱鬱作詩寄所懷相
見應有日

題畫二首

江村昨夜西風起木葉蕭蕭墮江水水邊蘋蓼正開花
粧點秋容畫圖裏小舟一葉弄滄浪釣得鱸魚酒正香
醉後狂歌驚宿雁蘆花兩岸月蒼蒼

同雲蔽天風怒號飛來雪片如鵝毛須臾羣峰失翠色
等閒平地生銀濤探梅詩客多清趣瘦蹇衝寒溪上去
只聞風送暗香來不識梅花在何處

日暮絳州道中

行行度山岡望望指城郭雲收雨意散天晚日色薄萬
籟鳴笙箏清風滿巖壑雖云途路遙此景殊不惡

題壁間畫

看山如看畫聽水如聽琴水流碧溪轉山高白雲深俯

仰天地間萬物本無心松風颯然來為我滌煩襟

寒夜煮茶歌

老夫不得寐無奈更漏長霜痕月影與雪色為我庭戶
增輝光直廬數椽少隣竝苦空寂寞如僧房蕭條廚傳
無長物地爐熱火烹茶湯初如清波露蟹眼次若輕車
轉羊腸須臾騰波鼓浪不可遏展開雀舌浮甘香一甌
啜罷塵慮淨頓覺唇吻皆清涼胸中雖無文字五千卷
新詩亦足追晚唐玉川子貧更狂書生本無富貴相得

意何必誇膏梁

五言絕句

惜春

無計留春住從教去復來
明年花更好只是老相催

春曉

晝靜暖風微簾垂客到稀
畫梁雙燕子不敢傷人飛

落花

春來又春去花落復花開
老少尋常事何須廢酒杯

暮春

槐柳拂雲長清陰覆短牆羣芳俱落盡祇有菜花黃

小樓即景

樓外青山好樓前綠樹多闌干知幾曲曲曲費吟哦

偶題三首

日落風欲靜鳥啼人自閒白雲如解事成雨便歸山

其二

倦鳥投林處斜陽在樹枝薄雲收未盡山雨乍晴時

其三

薰風何處來吹我庭前樹啼鳥愛繁陰飛來不飛去

夏景

簾捲薰風動庭空白日長可憐雙蛺蝶猶戀菜花黃

喜雨

雨洗乾坤淨恩沾品物新俯觀寰海內無復皺眉人

日暮

歸鴉爭遶樹落日半銜山微雨晚來歇孤雲獨自還

秋意

池上秋風起
池中秋水涼
芙蓉好顏色
可惜不禁霜

春夜

長風送華月
照我庭前樹
宿鳥忽驚飛
雙雙背人去

清明日戲題

纔看花滿枝
又見花零落
春光不自留
莫怪東風惡

夏日晚景

浮雲含雨意
斜日弄波光
暮景難留戀
誰言白晝長

紀夢中作

判袂不辭難出門山更山來年二三月竚聽凱歌還

夏日散步庭下偶題

雨過苔痕淨庭空日影遲好懷誰會得啼鳥在花枝

清源分司林檎去時始見開花自平陽還則結
實久矣因成二十字

去時樹開花來時花結子如何馬上人來往只如此

舟中

達道疲鞍馬舟行得暫閒推蓬看風景祇見太行山

題金壁山水二首

溪山疎雨歇水木散清陰樵唱知何處白雲深更深

其二

花發東風軟鳥啼春晝閒抱琴出門去隨意看青山

送趙參議之浙江

楓宸初拜命江浙已馳名到任君應喜西湖徹底清

并州北門城樓

塞北窮冬候無風也自寒樓高窺朔漠無事莫憑闌

凍鵲

獨占高枝立天寒伴侶稀明朝春意動好向上林飛

獨坐

焚香坐一室馳心向萬里有官脩其職展轉安得已

見新月感懷

新月似銀鈎彎彎掛客愁相思萬里外薄暮倚層樓

和高僉憲雜詠

手捫水中月誤觸清虛殿竊藥歸掌中祇恐姮娥見

暮景

怪底東風惡寒威透客衣捲簾雲接地撩亂雪花飛

春寒

遠山猶帶雪淺水未生波花柳無消息春寒可奈何

除夕宿太原寒甚

寄語天涯客輕寒底用愁春風來不遠只在屋東頭

春日客懷二首

馬上春如夢空嗟歲月長天涯無限路芳草自斜陽

其二

莫把層樓倚樓高接遠天東風鄉國路直在白雲邊

春日登樓

柳條如翠線萬縷織春愁遮斷東風路無緣入畫樓

春思

春色二分過花枝一半開天涯芳草遍遊子幾時回

膽瓶梅

數點枝頭雪分明露化工恐教塵土浣移入玉壺中

秋意

溽暑隨風散微涼趁雨生蕭蕭樹頭葉已解作秋聲

五言律詩

春寒病中自慰

別離驚歲換老病怯春寒脫幘擁衾卧移書就枕看暗
將歸計卜聊把客懷寬早晚金臺路東風拂繡鞍

冬至日思親

客裏逢佳節天涯憶老親
葭灰初應候梅蕊漸回春
醉訝朱顏好愁添白髮新
孤雲恒在望翹首欲沾巾

鄭州遇學正沈平之

一從分袂後兩地各悽然
道路千山隔音書幾度傳
相逢成感慨欲別更留連
清話休辭久重來又隔年

喜雪

凍迷駕瓦冷花簇鳳城春
和氣成三白歡聲洽萬人
樓臺失遠近草木動精神
豐稔何須卜堯年瑞應頻

八月四日夜月

誰將白玉鉤掛向柳梢頭
鏡缺姮娥恨眉顰越女羞
生光從此夜滿魄待中秋
但願團圓夕相看入鳳樓

穀日喜晴

穀日晴明好豐年信可期
雪消風澹澹天暖日遲遲
東作因時起西成與歲宜
憂民無限意對此暫舒眉

因觀王金陵效白樂天何處難忘酒之作喜其
切近人情乃亦效顰非敢追蹤前人不過遣

興而已二首

何處難忘酒隆冬客異鄉門前風凜凜天外雪茫茫候
館人煙少前途道路長此時無一盞安得解愁腸

其二

何處難忘酒承恩晝錦榮賓朋相慰藉兒女共攀迎白
髮庭闈健青春事業成此時無一盞安得叙歡情

絳州分司謾興

高居遠塵世嘉木結繁陰葉密藏山果池清立水禽簾

垂花隔戶石迸笋穿林鎮日看書坐翛然解俗襟

暑月將自太原巡汴

三晉衝寒到中州冒暑回山川元不改節候自相催綠
樹連天暗紅葵向日開太行雲縹緲搔首意徘徊

回朝偶題

老去驚時換公餘覺晝長池風荷偃翠林雨杏垂黃舊
業存書卷閒情付藥方偶來北窗下高枕夢羲皇

望雨無寐曉起偶題

聞雞推枕起曙色漸分明樹暎旌旗影風傳鼓角聲雲霓常在望天地豈無情坐待甘霖降羣黎各遂生

次日陰雲密布不雨復散

潑墨濃雲布漫空雨意懸斯須露紅日依舊靚青天祈禱知何益焦枯亦可憐菲才膺重寄值此更悽然

太行途中雜詠

碗子城邊路年來幾度過山川認行色花鳥熟鳴珂戀闕情何限瞻雲思轉多壯懷成激烈彈劍欲高歌

到澤州

信馬天將暮離山路轉平川
縈太行驛樹繞澤州城落日
翻旗影長風送鼓聲孤雲在天際回首若為情

題古寺

古寺知何代荒涼倚翠微
凝塵生佛面落葉擁禪扉
殿迥香鐙寂廊空鳥鵲飛
塔鈴風外語應似怨斜暉

聞朝覲官有喜且以致勉勵之意於屬吏云

聖主當天運諸侯述職歸
珮聲辭禁闕香霽散朝衣
戒

勅頒天語生成顯化機
旃圖報稱莫使寸心違

春日即事

案牘閒清晝歌謠遍里閭
光風回細柳甘雨洗嘉蔬
遣興盃中物消愁几上書
所期民物阜此外復何如

遊春

滿路香塵起尋春思欲迷
樹晴鶯出谷溪暖燕銜泥
玉勒嘶芳草青樓瞰大堤
風光無限好都在畫橋西

春愁

謾說韶光好關心別有愁雨慳禾未種土渴麥難抽吏
牘勤披檢民風肆訪求尋芳游冶子爭識廟堂憂

連日大風至十八日午後乃止喜賦

狂風當午歇庭戶絕纖塵落盡粘芳草遊絲挽暮春間
關鶯語滑來徃燕飛頻縱是韶光晚相看亦可人

日晚至文水

溪明寒日落樹暝夕煙生飛鳥隨人語長風擾樹聲鼓
笳悲遠戍車馬厭脩程騎火前村起山城候吏迎

春日大風感懷

遠塞足風沙春深不見花層冰猶度馬弱柳未藏鴉
易醉愁邊酒頻歸夢裏家凭闌一搔首心緒亂如麻

送吳繡衣還朝

觀風俱是客君去我何時暮景春三月離情酒一卮
遠歸真可喜漫醉不須辭珍重同年誼應勞別後思

春日客中謾興

客懷雖寂寞春意自堪憐草色翠如織花枝紅欲燃
鳴

鳩疎雨後啼鳩暖風前翹首天涯路韶光又一年

山行

望極羣峰遠行穿一逕幽雲從樹杪起水遶竹根流酒
旆搖村舍鐘聲出寺樓多情林外鳥巧語答鳴騶

客途春陰

薄雲和日色底事弄陰晴駐馬空回首鳴鳩不住聲東
風吹野草暮靄起山城擾擾長途倦逢人即問程

喜雨二首

和氣成甘雨沾濡意轉深一犁通地脈萬物識天心花
柳滋春意山川起夕陰農夫咸喜悅點滴直千金

其二

花外錦鳩啼催來雨一犁眼前生意足頭上暖雲低紅
透花枝重青涵草色齊明朝出城郭走馬踏春泥

秋晚山行

日落千山暝風高萬木凋深溝通曲徑獨木架危橋客
路空迢迢離情轉寂寥驛樓看漸近時聽馬蕭蕭

秋暮汴中述懷

汴城秋節暮候館客愁新京國馳情久家山入夢頻塞
鴻愁月夜籬菊慘霜晨借問歸何日浮名絆此身

喜晴

久雨晴偏好羣芳各鬪妍柳濃鶯恰恰花暖蝶翩翩風
景逾三月韶光直萬錢尋春無限意緩著紫絲鞭

暮春後歸興

雨洗乾坤淨羣峰露翠微水清魚自見花謝蝶還稀零

落驚春暮蹉跎與願違耳邊山鳥語勸我不如歸

太行山中曉行

月落日未出東方隱又明雲連懷慶郡霧繞澤州城道
路淹歸計關河動客情故鄉不可見搔首望神京

自嘆

白髮太無情年來次第生官清存晚節才薄負虛名秋
雨黃河水春風碗子城巡行知幾度候吏厭逢迎

偶得

地僻塵囂遠公餘興未清過門無俗轍閉戶有書聲
從皆時彥謀謨盡物情菲才叨重寄何以答昇平

漫題屋壁

卜得幽居好秋來景倍佳堂虛先得月城近每聞笳
雨洗蒼梧葉風吹白藕花門前無列戟錯認野人家

秋日即事

風靜林塘好波光一鑑開金魚穿綠藻翠竹映蒼苔
幽草鋤還長馴禽去復來時清公事簡冠蓋日徘徊

喜雨

日入千山黑層雲構夕陰一聲雷送雨萬國土成金品
物回生意閭閻誦好音天公應有在知我愛民心

雨後散步

小園疎雨歇散步快幽情行處蒼苔滑吟邊緣草生薄
雲還掩暎初月未分明撫景聊成趣塵煩喜暫清

延津縣

縣治蕭條甚疲民疫病多可憐官失職況是歲傷和空

廩全無積荒田更起科撫安才智短獨立奈愁何

荒村

村落甚荒涼年年苦旱蝗老翁傭納債稚子賣輸糧壁
破風生屋梁頽月墮牀那知官府內不肯報災傷

塞垣紀興

寒雲迷古塞積雪照平川境外風塵靜樓頭鼓角傳廟
堂勤遠略節鉞鎮窮邊巡撫應多暇乘驄裒玉鞭

秋日述懷

塞垣霜信早北雁往南飛
水冷蓮房老林疎木葉稀
有官居出鴈無地覓庭闌
何限關心事臨風一歎歎

除夕

今宵是除夕明日又新年
爆竹驚殘夢寒銓照獨眠
風霜催臘盡梅柳得春先
撫景情無限那能不悵然

送御史莫資本還南京

碧雲開霽色黃葉作秋聲
仗節還烏府承恩出鳳城
官途期遠大憲度喜澄清
濁酒不堪飲題詩慰別情

七言律詩

賦得玉泉垂虹

巨靈劈石迸流泉，萬丈虹霓著地懸。
怒捲風雷趨瀚海，細分脈絡貫長川。
千巖濺沫雲應濕，一鑑澄空月正圓。
寶甕誰能釀春酒，稱觴獻壽祝堯年。

賦得瓊島春雲

玉壘金城七寶臺，綢繆佳氣自天開。
長依瑞日迎車輦，每逐仁風被草萊。
輕帶春陰花外度，清隨曙色柳邊

回廣寒宮殿承恩處曾覩龍文接上台

初冬客途感懷

小雨冥冥不濕衣
饑鶯高貼野雲飛
南來北往河山迥
秋盡冬初草木稀
半夜還家歸夢好
十年為宦客情微
故園茅屋收成後
啄黍黃雞想正肥

和余吾驛壁間詩

煌煌使節下并州
俯仰乾坤豁遠眸
萬里關河迂馬足
十年風雪敝貂裘
北連河朔風塵靜
東望都門瑞氣浮

車騎紛紛催曉發一聲雞唱五更頭

初度

碌碌庸庸四十餘因逢初度轉躊躇腰黃久負金為帶
頭白驚看雪滿梳剩喜門庭無賀客絕勝廚傳有懸魚
清風一枕南窗臥閒閱床頭幾卷書

與顧趙范三繡衣晚酌醉後偶題

臨風長嘯岸烏紗賓主相忘醉眼花千里逢人俱是客
十年持節未還家欲將海水添盃量却笑秋霜入鬢華

酒醒更闌成獨寐夢魂依舊繞天涯

自嘆

鬢花斑白帶圍寬竊祿無功久曠官岸幘耻為寒士語
調羹不用腐儒酸逢人只說還家好垂老方知濟世難
戀戀西湖舊風月六橋三塔夢中看

客中感懷

十年蹤跡厭紅塵功業無成白髮新夢裏不知身是客
覺來惟有影相親夕陽衰草梁園暮細雨閒花沁水春

馬足經行今幾度溪山應笑未歸人

還京述懷

省間黃色應歸期正值清秋八月時封事預需當宁問
音書先慰倚門思宦情落落從來懶吏牘紛紛欲去遲
好在故園三畝宅功成身退是男兒

秋夜歸興

華月行空流素光星辰隱隱動寒芒煙銷寶篆金鑪冷
水咽銅壺玉漏長望斷鄉書無過鴈牽成離恨有啼鴛

敝廬只在吳江上
蓴菜鱸魚入夢香

春日客懷

年年馬上見春風
花落花開醉夢中
短髮經梳千縷白
衰顏借醉一時紅
離家自是尋常事
報國慚無尺寸功
蕭瑟行囊君莫笑
獨留長劍倚晴空

登樓書興

公暇登樓立彩旃
客懷撫景倍淒然
千家綠樹蒼煙外
數點青山落照邊
暮景侵尋欺病骨
秋霜容易上華顛

自知不是經綸手
附郭須營二頃田

除夕夜坐感懷

東燭焚香坐不眠
夜長難到五更天
懷人此際隔千里
為客明朝是十年
遠道風霜嗟老矣
故園梅柳想依然
椒盤獻歲知誰共
獨把金杯對影傳

送吳繡衣還朝

平明走馬入京畿
楊柳飛花點繡衣
山外有山頻入望
客中送客轉思歸
紅雲高拱天門邃
綠樹深藏驛路

微渡却黃河知己少臨岐盃酒莫相違

過中牟魯恭祠

長民曾羨魯恭賢民物熙然各遂天境外遺蝗徒擾擾
桑間馴雉自翩翩閭閻風俗猶前日史傳聲華紀昔年
寄語卽官勤撫字循良衣鉢要人傳

聞甘州等處捷報有喜

露布星馳上玉京三邊戰氣一時平人間玉石銘勲業
天上銀河洗甲兵羆虎有勞咸進秩烽烟無警可安生

從今海宇風塵靜廟算應知出聖明

嘆賈平章廢宅

豪華汨沒幾星霜廢宅空遺孔道傍
鼠迹印塵盈故榻燕巢經雨落空梁
紫雲歌斷人千古金谷花殘夢一場
世事興衰總如此啼鴉不必怨斜陽

過五攢山

五攢山下路盤旋曲阜崇岡遠接連
十里郵亭數椽屋幾家村落一坵田
林梢日沒僧歸寺澗底冰消鹿飲泉

詩思多從鞍馬得驛驄不用苦加鞭

盤陀驛道中

羣峰盡處是盤陀小徑紆回亂石多
風約閒雲難作雨渠分流水不成河
門開野店羣雞唱花發春山百鳥歌
一段好懷無著處令人對景費吟哦

遣懷

纔離汴水又并州馬上光陰易白頭
出處每懷心耿耿是非誰較論悠悠
貂裘不畏三冬雪燕領終封萬里侯

珍重晚來風景好黃花老圃殿高秋

春風

蕩漾無端入畫堂簾櫳微動晝初長暖催花底鶯聲滑
輕拂簷前燕翅忙酒醒香塵凝座榻夢回芳草滿池塘
飄揚不解留春住又逐鞦韆度粉牆

憶晉祠風景且以致望雨之意

懸甕山前境趣幽邑人云是小瀛洲羣峰環聳青螺髻
合澗中分碧玉流出洞神龍和霧起凌波仙女弄珠游

願將一掬靈祠水散作甘霖遍九州

夜宿山館書懷

蕭然山館似僧房三尺寒檠一炷香
風捲松濤清入夢窗涵月色冷侵牀
僂來不覺良宵短明發從教去路長
但願兩藩民物阜不知何處是他鄉

薇垣春曉為山西王大參賦

漏渴銅龍報曉衙月鈞猶在紫薇花
分藩任重數千里化筆春回百萬家
香藝雕盤籠睡鴨銓輝青瑣散棲鴉

相看旦氣清如水坐待金烏出海霞

春水

東風鼓浪散輕冰萬頃玻璃一望平白鳥下來分細穀
錦鱗驚躍破浮萍臨流畫閣圖中見載酒樓船鏡裏行
安得天瓢都挽取化為甘雨潤蒼生

憶璚英

璚英一別已三年夢裏常看在膝前婉婉性情端可愛
嬌癡態度亦堪憐誦詩未解知音節索果惟應破俸錢

白髮雙親在堂上關心為爾更淒然

連日燈花鵲噪漫成

夜看銀臺吐絳花曉聞靈鵲噪簷牙民安足遂中心願
年壯何妨到處家得失紛紛隨夢蝶公私擾擾付鳴蛙
晚香好在東籬菊相伴秋霜入鬢華

雪霽之夕聞簷溜有聲因賦

人皆愁聽客中雨我獨喜聞窗外聲報國常懷豐稔
念關心不是別離情沾濡最愛滋羣品點滴何妨到五

更倏起披衣成兀坐焚香讀易候天明

閱武

聖主當天致太平
守臣閱武向邊城
一川花弄旌旗影
八面風傳鼓角聲
羽鏃穿雲誇電疾
戈矛映日闢霜明
三軍銳氣能如此
會縛戎王獻玉京

嗽疾達旦不寐

寒疾攻人寐不成
惺惺欹枕候天明
十朝九病非無藥
一刻千金浪得名
戀闕心馳京國路
思親腸斷武林

城男兒此外無他事莫笑浮名絆此生

詠煤炭

鑿開混沌得烏金藏蓄陽和意最深
燭火燃回春浩浩洪鑪照破夜沉沉
鼎彝元賴生成力鐵石猶存煖後心
但願蒼生俱飽暖不辭辛苦出山林

天門山

天門山峙近西偏屹立芙蓉翠插天
六月岡巒飛雨雪四時草木吐雲煙
鳥飛不過巖頭石人渴難尋澗底泉

安得六丁施斧鑿滔滔車馬信平川

觀書

書卷多情似故人晨昏憂樂每相親眼前直下三行字
胸次全無一點塵活水源流隨處滿東風花柳逐時新
金鞍玉馬尋芳客未信吾廬別有春

落花

半隨流水半隨塵斷送韶光惱殺人蜂蝶有情悲寂寞
園林無處覓精神眼前紅雨飄零盡堦下蒼苔點綴新

分付家童莫輕掃
醉眠還勝錦為茵

飛絮

飄飄隨意點輕裘
播蕩東風不自由
亂逐紅塵迷客路
輕隨綠燕入歌樓
梁園飛雪驚春夢
渭水斜陽送客愁
莫向樽前苦惆悵
綠陰還在粉牆頭

交城道中

峰巒重叠樹微茫
回首清源道路長
僧屋數椽臨野水
人家一半住山鄉
龍歸洞口雲煙濕
麝過林間草木香

隨處停驂問民俗不知歸鳥背斜陽

孝義縣懷古

茫茫煙樹繞孤城千載猶傳孝義名
郭巨墓荒春草合比干臺古野煙生
落花飛絮迷征旆剩水殘山惱客情
鞍馬悠悠無限意不堪回首暮雲平

過韓信塚

躡足危機肇子房將軍不解避鋒鏑
成功自合歸真主守土何須乞假王
漢祖規模應豁達蒯生籌策豈忠良

荒墳埋骨山腰路駐馬令人一嘆傷

過皋陶廟

明刑弼教佐雍熙千載嘉謨仰士師故里淒涼遺舊塚
穹碑剝落倚荒祠虞廷法立人無犯後世民生偽益滋
廟貌幸存神未泯賡歌猶得想當時

過夏縣挽司馬文正公

破甕機鋒豈偶然活人手段自髫年閭閻稚子知司馬
海宇羣黎仰涑川出處遂關時治亂歿生難免世推遷

蒼松勁柏環祠墓凜凜清風在目前

平陽分司

槐柳如雲覆院牆清和天氣日初長
雨餘堦砌苔應滑
花落池塘水自香
謝客只容風入戶捲簾閒放燕歸梁
吏民清肅文書簡吟對羣峰坐畫堂

觀登科錄感興

聖主垂衣御九重羣賢景進萬方同
文明啟運天垂象
豪傑乘時氣吐虹
柳汁染衣新樣綠花枝映面醉顏紅

當年我亦曾遭際塗抹于今避下風

初度日

年年馬上度生辰老景偏攻客裏身白髮無能酬聖主
清宵有夢覲雙親仙家漫說延齡術塵世應無不死人
脩短榮枯天賦予一官隨分樂清貧

王大叅以春景諸作見遺賦此以答

烏府聯鑣憶舊游新詩慰我客邊愁胸中生意由天造
筆底行雲似水流清唳喜聞空外鶴浮名笑破水中漚

何時共遂歸田計千里郵筒迭唱酬

初度自責

每逢初度益淒然却訝增年是減年濟世愧無書滿腹
投閒何待雪盈顛關山迢遞迷歸路歲月淹留費俸錢
任重才疎成底事西湖豈乏釣魚船

望雨

赤日行空暑氣浮炎風簸土幾時休雲霓久渴斯民
望廊廟當分聖主憂旱魃勦除消沴氣神龍鼓舞起

靈湫挽將天上銀河水散作甘霖潤九州

晉祠禱雨曉行

曉行數里未天明路繞汾河聽水聲斜月帶星橫遠漢
清風傳漏報殘更中心但願靈祇格遠道何須父老迎
好挽銀潢作甘雨溥沾率土潤蒼生

夜四鼓城隍廟合祭羣神

銀燭金鑪布廟廷光輝照夜奪繁星共祈霖雨蘇群品
普願天符命六丁造化無私應洞鑒鬼神有耳亦同聽

虛空陡覺濃雲布更喜飈輪即漸停

夏日公餘

三邊無警靜烽煙客散轅門思悄然池面雨晴荷蓋小
庭中日午樹陰圓清心閉戶看周易解慍臨風鼓舜絃
菲薄將何稱獻納兩藩旌節漫留連

庭前葵花盛開詩以賞之

庭院深沉白日長羣芳無處避炎光獨將翠葉承朝露
自吐丹心向太陽夜短不愁花睡去春歸何用蝶飛忙

關情相對薰風裏
賸把新詩詠錦囊

并州五月中旬雨未霑足而風氣蕭然與清秋
無異感而賦此

客懷搖落向并州
五月蕭然似九秋
午榻清風閒白羽
夜窗寒夢怯黃紬
樹陰慘地雲遮日
嵐氣飛簷雨入樓
離思宦情千萬種
都隨景物到心頭

祈雨蔬食

苜蓿盤中意味長
經旬不近酒盃香
亦知厚祿慙司馬

且守清齋學太常
客底情懷空抑鬱
冥中感應豈微茫
黃蘗百甕皆前定
助我平生鐵石腸

新城請水祈雨有應

槭香百里叩龍祠
乞得靈泉浸柳枝
酌水獻花羅父老
吹簫擊鼓走童兒
神風靜默雲生石
和氣薰蒸雨應時
頃刻寰區生意足
從知天地本無私

病起登樓

晚來扶病強登樓
迢遞山川入遠眸
紫塞接連沙漠去

黃河還繞郡城流
天涯芳草重重恨
風外飛花點點愁
往事驚心如夢寐
幾回翹首望神州

新柳

不禁風力強扶持
裊裊樓前舞瘦枝
遠客臨行應著眼
佳人纔唱却顰眉
飛花未覩漫天雪
弄影先看拂地絲
立馬樹邊無限意
黃鸝聲在最高枝

過方山

馬蹄歷盡萬重山
霄漢相離咫尺間
白石清泉堪枕漱

丹崖翠壁倦躋攀
雨餘林外羣芳歇
煙暝松頭一鶴還
迢遞客途無限意
強將詩句解愁顏

七夕感興

燭燼香銷夜漏遲
人間天上共佳期
女牛有約通銀漢
兒女虛傳送綵絲
月色冷侵丹桂影
露華涼沁碧梧枝
客窗孤枕難成寐
臥聽誰家玉笛吹

離京

親朋且莫唱離歌
垂老其如遠別何
白髮漸從愁裏長

青春半向客中過
山寒日落人煙少
月冷江空雁陣多
今夜客窗孤枕上
可能無夢到蠻坡

夜坐

銀臺火冷墜燈花
粉堞霜寒咽鼓笳
窗月照來人影瘦
邊風吹散雁行斜
情多轉覺孤懷切
老近生憎兩鬢華
坐久無聊纔就枕
却驚夢裏得還家

春晝

蕭條候館度芳春
暗惜韶光過眼新
草色入簾閒白晝

花陰滿地隔紅塵從知處世若大夢何用浮名絆此身
十里湖邊三畝宅青山應笑未歸人

漁

隨分生涯一葉舟利名不到釣竿頭桃香浪暖三春雨
木落江空萬頃秋渭水西風吹鶴髮嚴灘孤月照羊裘
悠悠往事何須問酒美魚鮮醉即休

畊

清時幸作太平民繞屋田園未是貧數口生涯資五穀

一年辛苦在三春生憎稚子扶犁懶最愛山妻饋餉頻
衣食不虧租賦給幡然何必慕畊莘

曉行

朧朧淡月帶疎星喔喔殘雞報五更燈火一攢開野店
鼓笳三疊啟嚴城霜凝峻阪鳴騶緩燒起疎林宿鳥驚
風透重裘寒不耐郵亭駐節候天明

寓清源

荒城數里半淤沙衰柳千株集亂鴉道上雙騶迎使節

水邊一犬吠人家重重山色迷行色點點霜華入髮華
遙憶江南好風月客窗清夜夢梅花

夜寒不成寐起坐觀書

寒夜迢迢惱客眠更從鐙火理殘編關情鄉國五千里
屈指光陰四十年縹緲帝都紅日下依稀親舍白雲
邊永懷忠孝何能盡默默安能守太玄

夜坐念邊事

蕭然一室如僧舍秉燭焚香坐夜闌却笑酒酣氈帳暖

誰憐漏永鐵衣寒
安知天下無三傑
但願軍中有一韓
世事關心成感慨
旋移書卷就銓看

和梅詩二首

雪中一點笑生春
韞色含香怕惹塵
結實須歸調鼎手
開花不近冶容人
祇緣鐵石心腸勁
結得松筠契誼真
東閣吟成詩百首
卻驚筆力會通神

一枝邂逅漏先春
不著寰中半點塵
鐵石心腸賢宰輔
瓊瑤肌骨謫仙人
獨親和靖能知己
更倩華光為寫真

此外空山誰是伴清風明月共怡神

塞上即景

目極煙沙草帶霜天寒歲暮景蒼茫
炕頭熾炭燒黃鼠馬上彎弓射白狼
上將親平西突厥前軍近逐左賢王
邊城無事烽塵靜坐聽鳴笳送夕陽

喜高僉憲病痊口號戲之

聞君何事病恹恹鎮日焚香不捲簾
莫怪藥囊嘗處苦還知蔗境老時甜
一團清氣難隨俗百甕黃齏足養廉

造化小兒從此遁吉人天相不須占

別四川方伯邢景

十年佐政向中州一旦超遷寵數優
全蜀行沾張詠化兩河未許寇恂留
月明巫峽猿爭嘯雨過瞿塘水亂流
還惜故人成遠別客中無日不登樓

立春日感懷

年去年來白髮新
息息馬上又逢春
關河底事空留客
歲月無情不貸人
一寸丹心圖報國
兩行清淚為思

親孤懷激烈難消遣謾把金盤簇五辛

詠雪

纔聚還消似可疑天公深意許誰知但令海宇均滋潤
不使閭閻起怨咨裁翦六花如有意斡旋一氣本無私
登高望遠空吟賞誰和陽春白雪詞

立春

擊罷泥牛物候新一鞭分與萬家春未萌草木先回潤
久屈龍蛇漸覺伸對景謾傾銀甕酒看花遙想玉京人

東郊明日迎陽去蹀躞驂駟踏軟塵

立春後寒甚二首

朔吹號寒激箭鋒初春凜凜似嚴冬層冰未泮江頭水
積雪還迷天外峰閒對青銅搔白髮却思金屋賜黃封
關情最是庭前柳翠黛含顰恨幾重

坐擁紅鑪尚怯寒邊城況是鐵衣單營中午夜猶傳箭
馬上通宵不解鞍主將擁麾方得意迂儒撫劍謾興嘆
東風早解黃河凍春滿乾坤萬姓安

春雪

寒結濃雲布晚空
六花撩亂舞東風
素娥裁翦無多力
青帝陶鎔第一功
歲暮祥開三白好
春回瑞應萬方同
豐年有兆羣心悅
題詠應慙句未工

春日懷京師風景

閭闔風暄瑞靄飄
御溝水滿雪全消
花迎劍珮趨青瑣
柳拂旌旗映畫橋
一派簫韶仙仗擁
千家簾幙酒旗搖
不堪馬上春如夢
悵望蓬萊隔九霄

自嘆

平生糟粕數行書潦倒真成一腐儒
天外冥鴻何縹緲雪中孤鶴太清癯
聰明不及頑如舊少壯無能老更迂
覽鏡自驚還自嘆又添幾縷白髭鬚

蚤春登樓遣興

千條柳線織春愁不放韶光入畫樓
遠塞天低雲漠漠長河風靜水悠悠
十年客路雙蓬鬢萬里歸心一葉舟
南北往來成底事此身無恙任沉浮

送張御史還京

繡衣東去馬翩翩
冀北觀風又一年
使節遙瞻銀漢表
封章先達玉階前
落花飛絮催行色
急管繁絃促別筵
老我客中頻送客
不堪回首五雲邊

水村

茅屋三椽倚淺沙
門前蒲柳綠交加
鳬鷺竝宿藏荷葉
蛺蝶雙飛繞菜花
甘雨一犁滋穀麥
輕烟數里接桑麻
晚風天際孤帆客
艤棹來尋賣酒家

讀脩鍊書偶題

姍女嬰兒只浪傳不知何物是真鉛塵寰底處安金鼎
弱水無緣渡鐵船玉檢謾藏靈寶法紫陽空著悟真篇
死生晝夜皆常理饑則加餐困則眠

見白髮偶題

世間白髮最無情纔近中年次第生碌碌俄驚四十載
蕭蕭初見兩三莖黃花晚節依然好金液還丹豈易成
貪得由來戒遲暮何須辛苦事功名

夏日即事

密密榆槐散綠雲
蕭蕭亭館絕纖塵
林鶯巧語如留客
梁燕低飛不避人
歲月無情催暮景
江湖何處是通津
數莖白髮籠紗帽
深愧淵明漉酒巾

留別高僉憲

斯文骨肉最相親
況復比鄰唱和頻
淡薄年來輕世味
綢繆日久見天真
一鞭行色青山暮
兩地離情白髮新
馬上思君重回首
落花芳草不勝春

太原道中曉行

星稀月落曉風清猶聽雞聲報五更山勢平吞沙漠境
河流曲繞晉陽城天涯何處尋歸路野景無邊動客情
車騎縱橫皆故道不須候吏遠逢迎

徐溝道中

麥隴桑畦遠接連依稀村落動炊煙山溪水漫人喧渡
野寺日高僧尚眠馬足聯翩踈雨後客懷寂寞曉風前
庭闌縹緲知何處却望孤雲一悵然

清化鎮道中

琅玕深處翠陰涼，綠樹人家水遶牆。
宿雨潤含畦麥秀，南風吹送野花香。
行人指顧青山遠，駐馬徘徊白晝長。
景物雖同民俗異，不勝三嘆憶吾鄉。

舟中漫興

一葉扁舟駕順風，黃河九曲路西東。
沙鷗野鷺飛翔遠，岸草汀花點綴同。
望斷歸心帆影裏，驚回鄉夢櫓聲中。
推篷獨坐無餘事，祇有吟哦興不窮。

初度日感懷

百事無成兩鬢皤
浮生碌碌竟如何
開樽慶壽從來懶
撫景興懷比舊多
南極星辰延鶴算
西湖煙雨夢漁蓑
門無賀客心如水
臥看窗間日影多

夏日行太行山中

信馬行行過太行
一川野色共蒼茫
雲蒸雨氣千峰暗
樹帶溪聲五月涼
世事無端成蝶夢
畏途隨處轉羊腸
解鞍盤礴星軺驛
却上高樓望故鄉

夏日即事

槐陰凝綠暗堦墀
雨後薰風拂面吹
魚躍亂隨新長水
鳥啼爭占最高枝
紗厨冰簟難成夢
羽扇綸巾漸及時
兩間清夷無別事
觀書最喜日遲遲

許昌懷古

遠樹孤城認許昌
偶因風景嘆興亡
羣心本未忘劉氏
九錫何須假魏王
滿地煙霏山水晚
一陂秋水芰荷香
重論往事知何在
惟有穹碑對夕陽

過招撫岡

在裕州三十里
蓋光武取兵處

重噓炎燼肇中興此地曾經募義兵
古廟數椽誰下馬
崇岡千古尚留名
飄風入樹林鴉散宿雨沾泥野草生
觸景興懷無限意不堪回首裕州城

余吾道中

荒村古路人煙少零落郵亭屋數椽
野渡冰生寒雪後
遙山鳥沒夕陽邊
思家悵望頻回首信馬徐行懶著鞭
歸計不知何日定眼前風景又殘年

再賦嚴憲副梅花

莫笑疎花冒冷開，調羹滋味已胚胎。
數聲笛向風前奏，一脈春從天上來。
清白可能陪雪月，孤高元不惹塵埃。
暗香真入蛟龍窟，絕勝飄零點翠苔。

春寒憶家

碧紗窗外北風多，鎮日輕寒可奈何。
歲月無情人自老，江山如故客重過。
桃花深院飄紅雨，杜若芳洲泛綠波。
謾說故園春景好，不堪歸計又蹉跎。

重過天井關回轍廟

天井關前策馬過道傍古廟鬱嵯峨石留轍跡深如許
道在人心耿不磨殘雪初消山似洗暖風纔動鳥如歌
自緣景物縈懷抱莫怪重來感慨多

長子縣與同年文采聲華衆所傳出憲遠巡三晉地

繡衣使者舊同年文采聲華衆所傳出憲遠巡三晉地
行囊不貯一文錢銜杯彼此俱成醉上馬東西各舉鞭
明日五攢山下路不堪回首思茫然

登樓感懷

晚來無事漫登樓
曲曲欄干總是愁
渺渺鄉關何日到
茫茫天地此生浮
太行有路東西去
汾水無情日夜流
華髮蒼顏成底事
可能辜負釣魚舟

陳繡衣席上醉歸口占一律

停盃不飲意如何
更漏沉沉夜半過
寶篆隨風香捲霧
金樽映月酒生波
休嫌白髮歡娛少
自信青雲意氣多
扶醉歸來清興濶
乘槎直欲泛銀河

聞都御史顧公致政有喜

天上歸來兩鬢蒼故園草木盡輝光
功成却喜恩榮厚身退從知姓字香
林下且消閒歲月臺端猶憶舊冰霜
春風詩客從容處重覩羣英會洛陽

聞蟬聲

密槐高柳覆華堂滿地薰風白晝長
却怪蟬聲驚客思不容蝶夢到吾鄉
清高最喜含朝露斷續何須怨夕陽
蚤晚涼颼天際起萬山秋色又蒼蒼

秋晚行山西道中

暮雲收盡雨初晴
馬首關山路幾程
落日旌旗迎使節
西風鼓角動邊城
溪流清見行人影
霜信寒催過雁聲
最喜田家生事足
村村笑語樂秋成

秋日經太行

茫茫遠樹隔煙霏
獵獵西風振客衣
山雨未晴嵐氣濕
溪流欲盡水聲微
回車廟古丹青老
碗子城荒草木稀
珍重狄公千載意
馬頭重見白雲飛

壁間畫瀟湘八景

煙寺微茫幾杵鐘
漁村斜暝夕陽紅
平沙落鴈迷輕靄
遠浦歸帆趁便風
山市微嵐孤嶼斷
江天欲雪暮雲同
洞庭月色瀟湘雨
想像陰晴似夢中

問月

凭闌笑語問姮娥
時缺時圓意若何
底事生成蟾皎潔
誰人種得桂婆娑
霓裳舊曲曾傳否
玉兔靈丹肯與麼
不信冰輪高幾許
清光能得遍山河

秋風

蕭蕭入夜動清商
披拂園林草木黃
快意掃除天下熱
可人吹送枕邊涼
荻花楓葉愁江渚
蓴菜鱸魚憶故鄉
萬里碧天雲散盡
衝開征鴈不成行

秋光

秋水無痕徹底清
秋山如畫更分明
鴈鴻影裏雲連塞
砧杵聲中月滿城
暝日丹楓輝錦樹
傲霜黃菊綻金英
不須頻上高樓望
此景由來惱客情

秋峰

浮雲散盡雨初晴
天際羣峰削不成
萬朶芙蓉相掩映
九華仙掌自分明
幽崖樹色經霜古
絕頂松濤入夜驚
日暮南樓增爽氣
可能相對豁吟情

秋波

雨足江湖水色新
碧琉璃滑淨無塵
潮回萬頃鋪平靨
風過千層簇細鱗
野鷺沙鷗爭出沒
白蘋紅蓼倩精神
箇中浩蕩無窮趣
都屬中流舉釣人

秋鴻

相呼相喚過南樓
叫破江南萬里秋
有足不傳雲外信
無端偏惹客中愁
影橫斜月天連塞
夢繞黃蘆雪覆洲
霄漢翱翔應有自
生平不為稻粱謀

秋花

幾朵亭亭靚晚芳
無端淺碧間輕黃
山牆零露開時好
野館臨風嗅處香
冷豔不同桃李笑
幽情肯惹蝶蜂忙
霜禽錯恨韶光晚
碎語枝頭怨夕陽

秋林

一簇高低近翠微，
碧雲紅樹靜依依。
枝垂碩果霜初落，
鳥露危巢葉漸稀。
僧寺樓臺臨竹塢，
人家煙火隔柴扉。
半竿落日斜明處，
又見松頭一鶴歸。

秋夜

戍鼓聲傳夜未央，
松陰滿地露華涼。
苦吟不覺銀燈灺，
無寐偏驚玉漏長。
風靜半空聞過鴈，
堂虛四壁聽啼螿。
壯懷不任秋凌逼，
起向瑤階步月光。

秋聲

月淡星疎夜氣清
忽聞何處動商聲
初疑風雨衝愁至
復訝波濤入夢驚
寥泝似隨征鴈叫
淒涼如和草蟲鳴
不須更讀歐陽賦
感慨令人白髮生

秋月

冰輪湧出海東頭
光暎珠簾不上鉤
丹桂婆娑微有影
瑤樓高爽不勝秋
空遺靈兔千年藥
不盡姮娥萬古愁
時缺時圓成底事
金樽有酒且相酬

秋晚即景

獵獵西風捲客衣
茫茫衰草澹斜暉
山橫暮靄牛羊下
樹帶寒煙鳥雀歸
幾杵疎鐘鳴梵宇
一村鐙火掩柴扉
林梢喜見初生月
照我驂駢下翠微

秋日移菊

分得東籬雨後花
呼童栽近小窗紗
引泉灌溉滋新壤
剖竹編圍護嫩芽
自許琴樽相調笑
何須蜂蝶亂交加
杜門不納王弘酒
還勝柴桑處士家

秋夜獨酌

銀燭金樽暝盡屏消愁聊借酒為名醉來却喜朱顏在
畏老猶嫌白髮生無客可邀惟對影有銓相伴最關情
餘醒未解不成寐起向瑤堦月下明

秋興四首

一夜西風動遠林滿襟涼意覺蕭森蓮愁野渚消紅暈
樹老閒庭減綠陰鏡裏霜華添客鬢階前雨點碎鄉心
樓頭思婦闌情切半壁殘銓幾杵砧

西風一夜動關山秋意蕭森入夢間鴈陣不衝愁思斷
砧聲偏與客情關故園黃菊催歸興老圃丹楓暝醉顏
脩竹苦遭窗外雨朝來也作淚痕斑

莫向樽前笑白頭異鄉景物不勝秋露寒金井梧桐老
水冷銀塘菡萏愁落日平沙迷宿鴈西風遠浪起眠鷗
無端砧杵驚殘夢未到江南第一州

萬寶初成歛化功眼看秋色有無中開殘籬菊侵晨雨
落盡庭梧昨夜風野草忽從霜後白江楓故向日邊紅

蘆花兩岸滄江濶管領煙波屬釣翁

喜雪三首

朔吹號寒振九關
滕神翦水下人間
瓊葩亂發庭前樹
皓鶴羣飛海上山
書幌不須銀燭照
釣船披得玉蓑還
擁鑪兀坐無佳句
對著梅華益厚顏

天時人事兩相關
和氣絪縕覆載間
湧地銀堆千尺浪
攢空玉立萬重山
中郎持節吞氊臥
大將平淮奏凱還
往事悠悠何足論
且祈豐稔解愁顏

怪來寒氣入重關風約飛花撲坐間銀海平吞雲際月
瓊峰暗換屋頭山詩懷不為尋梅好酒價從教輟俸還
歲事豐穰應有兆九重喜色動天顏

雨後夜坐翫月

涼飈拂樹半含秋一雨先將暑氣收夜色遠分天際月
清光直入水邊樓玉簫有韻驚鄉夢銀漢無波洗客愁
遙想梧桐最深處美人和淚撥箜篌

秋興用陳繡衣韻

黃鵠摩雲壯氣增青虹貫斗劍光騰半生出處慙無補
一代經綸學未能指下徽音彈夜月筆端草聖裊秋藤
西風不盡思鄉意回首天涯憶舊朋

又順用韻

客邊荏苒歲華增對景空思舊日朋露冷蓮塘青結子
雨晴瓜圃綠牽藤酒盃自強醒還醉宦業誰論拙與能
彈劍高歌明月下幾回壯氣欲飛騰

倒用秋夜酒醒韻

年來華髮不勝簪別意常懸斗柄南親舍遙瞻雲渺渺
客居誰羨府潭潭庭涵月色人初靜樹帶霜華葉半酣
詩興蕭條無覓處遣懷聊仗酒盃三

秋夜睡醒偶賦

風送新秋爽入簾樓頭初月正纖纖三盃上臉成紅軟
一枕忘情到黑甜清露凝暉沾宿草明河倒影掛脩簷
客窗又動鄉關念却把燈花仔細占

秋夜獨坐復倒用酒醒感懷韻東陳繡衣

冠中白髮映朝簪馬首關山北又南魚雁鄉書淹歲月
蓴鱸歸興動江潭堂堂宦業鵬程遠碌碌浮生蟻戰酣
煙寺昏鐘猶在耳雞聲已報五更三

再用前韻答陳繡衣

西風吹鬢雪盈簪千里瞻雲目極南天外青山圖故國
雨中黃葉下空潭孤懷觸景情何限壯氣凌霄酒半酣
最愛霜臺能賦客新詩賡和不離三

用秋夜睡醒韻

盡日西風不捲簾輕陰無奈兩廉纖蓮含碧實心應苦
瓜熟紅瓤味正甜夜半關情蛩近戶晝長乞食鳥窺簷
兩藩弭節欣無恙進退行藏豈用占

清秋述懷倒前韻三首

老態潛從鬢裏占幾番覽鏡立脩簷仕途無愧甘清白
世味何須論苦甜晚穀迎風青穗舞嘉蔬出土翠莖纖
壯懷不逐秋容變一任蕭蕭雨滿簾

午漏還從日影占雞聲遠唱出茅簷鳥啼脩竹人初靜

門掩閒齋睡正甜
客底葦鹽甘澹泊
詩中錦繡闌襍纖
鳳仙零落西風急
紅雨霏霏亂入簾

黃甲聲名舊日占
誰論寸晷與風簷
鬢隨金井梧桐老
夢憶紅綾餅餤甜
巨浪排空銀闕湧
遠山過雨翠眉纖
秋光惹動思鄉意
一度登樓一捲簾

鄭州留別沈平之

東燭連牀坐夜分
漏聲和月度轅門
重論幼稚多堪笑
細數交游半不存
寂好知心成白首
可能醒眼對金樽

明朝又是梁園別
兩地相思勞夢魂

夜半散步庭下有感

夢回孤枕夜迢迢
起看星河欲動搖
庭月涵輝銀燭冷
窗風弄影篆煙消
虹光吐劍衝冥漠
豪氣隨詩破寂寥
盛世妨賢成底事
湖山有約在漁樵

題唐十八學士登瀛洲圖

經濟才猷結主知
從容館閣際明時
都將治世安民策
散作栽冰翦雪辭
五鳳樓高天路近
百花香細漏聲遲

畫圖仿佛登瀛趣展玩令人有所思

移竹

移得琅玕近畫堂歲寒心事兩相當
高枝直擬凌霄漢勁節還期傲雪霜
夜靜攜琴伴幽獨晝閒移榻就清涼
明時持汝朝天去吹向虞廷引鳳凰

送王太守宇之任

皂蓋朱轡出鳳城西風蕩漾馬蹄輕
新除明府聲華重舊說郎官玉雪清
城郭月中無犬吠山田雨後有人耕

畊四方太守皆如子海宇何憂不治平

晚涼書懷

九日炎蒸一日涼晚來無事立徜徉松篁月印當窗影
荷芰風傳隔浦香京國雖饒非故土梁園徒好是他
鄉何時謝老西湖上為傷雲山構草堂

詠白海東青

重譯何須事遠求自隨和氣到中州一團冰雪含奇質
萬里雲霄豁俊眸玉羽驚翻邊月曉霜翎點破海天秋

親藩入貢承恩渥五色絨絛錦臂鞬

題李景昌竹間書舍圖

萬玉蕭森遶四簷坐來惟覺雨纖纖小窗展卷循環誦
古鼎焚香取次添爽籟隨風來淨几清陰和月度疎簾
應知此地藏脩者蚤晚蜚聲不久淹

思歸詩文卷

去來無跡任翩翩千里思歸亦偶然自是斑衣勞夢想
難將慧劍斷塵緣昂昂孤鶴凌蒼靄隱隱雙鳬入紫煙

到日慈親應喜慰雲輶忽墜綵輿前

處靜齋卷

希夷心地本無塵聊借寰區寄此身
大藥何須金鼎鍊閒情惟與白雲親
庭前花影空啼鳥樹杪茶煙不見人
我亦平生耽靜趣卜鄰安得共棲真

汴城八景

艮岳晴雲

羣峰屹立鎮中州絕頂雲閒宿雨收
霞彩映紅開霽景

天光澄碧湛高秋清陰每逐珠簾捲佳氣常依綵仗浮
四海承平藩府樂不妨吟詠日登樓

大河春浪

冰泮洪河春意深桃花新漲湧千尋凌波釣艇綸竿濕
近水人家樹木陰危岸墮沙沉鳥跡長風鼓浪聽龍吟
臨流自得滄浪趣一曲高歌絕賞音

開寶晨鐘

日入斜窗曉氣清化王宮殿梵鐘鳴驚回夢幻知誰扣

送盡年華是此聲
地吼鯨鯢僧出定
路填車馬客登程
翻思待漏金門下
正擬封章達聖明

夷山夕照

不用攜壺上翠微
夷山相對伴餘暉
疎林返照牛羊下
遠樹斜明鳥雀歸
僧逐暮鐘還寶地
客尋旅館扣柴扉
壯懷未盡登臨興
一任西風振錦衣

金梁曉月

金梁迢遞接西城
曉騎騰騰踏月明
素魄隨人如有意

餘光伴影寂多情塵昏寶鏡輪蹄動樹墮冰輪鳥雀驚
却憶彤庭朝謁處幾番擁笏候雞鳴

資聖薰風

傑閣凌空歲月深公餘乘興一登臨偏宜殿角涼颼細
不受人間熱惱侵却扇頓忘三伏暑阜財還憶五絃琴
清心寂是簷前鐸響落層霄雜梵音

吹臺秋雨

郡城東畔古臺荒風雨瀟瀟送晚涼
靉靄山川迷遠近

高低禾黍墜青黃衝開暮靄帆來重叫破愁雲雁過忙
攜酒登高應有約莫教冷落妬重陽

百岡冬雪

凍合長河歲暮天喜看三白兆豐年東風柳絮沾衣袂
夜月蘆花覆釣船愛客不愁添酒興標梅何必聳吟肩
梁園詞賦應堪羨贏得新詩入管絃

二月初三日出使

春風堤上柳條新遠使東南慰小民千里宦途難了志

百年塵世未閒身豺狼當道須鋤殄餓殍盈岐在撫巡
自揣菲才何以濟只將衷赤布皇仁

濟寧道傍古塚

伊人埋骨已多年三尺荒坵路邊野鳥淒涼啼落日
石麟顛倒臥寒煙良平計策今安在房杜功名亦偶然
弔古欲詢何代客斷碑零落獨堪憐

村舍畊夫

倚門皓首老畊夫辛苦年年歎未蘇椿木運來桑柘盡

民丁抽後子孫無典餘田宅因供役賣絕雞豚爲了逋
安得歲豐輸賦蚤免教俗吏橫催租

路傍老叟

路傍遺老亦堪悲問着倉皇只淚垂恒產賣餘無業次
比隣逃盡少親知衰殘滿冀昇平日饑困仍逢旱澇時
見說朝廷寬賑恤也來叩首拜恩私

梁園

自古梁園佳麗地于今寂寞減繁華日長野店聞啼鳥

春暮山城見落花
絲柳兩行侵洛遠
黃河一帶入淮賒
欲將尊酒舒高興
錦帳風流愧黨家

徐州戲馬臺

落日遙登戲馬臺
懷鄉弔古獨徘徊
關河千里雁頻斷
風雨一天愁不開
霸業盡銷人已去
山形依舊我重來
何須細問興亡事
自是當初少用才

沛縣歌風臺

荒臺遺址尚嵯峨
過客經遊感慨多
逐鹿未傾秦社稷

斬蛇先定漢山河功臣累見收封爵猛士誰能為執戈
父老尚知千古事豈宜重問大風歌

病猿

鎖向虛廊不自由倦舒雙臂懶擡頭巴山夢斷霜華冷
梅嶺情牽樹影秋入定老僧心暫釋感時遷客淚初收
高門廣廈多豪富未必聞聲便有愁

題湛虛卷

仰看星斗屋無椽小住寰區八百年
兔挾冰輪澄性海

龍銜火炬照心田臥雲枕上何曾夢賣藥壺中別有天
門外紅塵走車馬幾人來此扣玄玄

秋夜賞月

風清月白水無波不飲其如良夜何美酒千鍾舒逸興
洞簫一曲和高歌香浮綺席飄丹桂影落金盃浥素娥
沉醉却疑霄漢近乘槎直欲泛銀河

送平江侯出鎮臨清

鼓笳載道出神州鐵騎連雲擁列侯綵旆行穿花外

路紮駟嘶近驛邊樓寸心深慰黎民望一面全分聖主
憂千里桑麻齊魯地呻吟從此變歌謳

夜坐偶題

寶篆香銷夜漏分娟娟霜月冷侵門雁聲偏惹離情動
燭影能欺老眼昏碌碌浮生驚節換悠悠往事共誰論
寒更五點星河澹又聽晨雞唱遠村

晚坐窗下偶題

車聲軋軋近墻東雁陣翩翩信晚風籬角黃花踈雨後

樹頭紅葉夕陽中湖山舊業書連屋江海狂歌劍倚空
可怪流年雙雪鬢相侵何事太息息

欲登樓未果先賦一律以見意

紅葉黃花殿晚秋碧雲青嶂倚南樓江湖汗漫迷歸路
草木蕭條動客愁一自衣冠辭鳳闕幾番風雪擁貂裘
中州不盡登臨興欲上層霄豁遠眸

蘇李泣別圖

嚙雪吞毡瀚海頭節旄落盡恨悠悠孤臣不為一身惜

降將應懷萬古羞絕塞旅魂驚永夜秦關歸興動高秋
表忠麟閣圖形像未數當年博陸侯

送黃郎中順陞湖廣參議提點太和宮

旌旆翩翩拂彩霞承恩清曉出京華錦衣天上神仙
客華屋山中宰相家芝草九莖同毓秀柳梅千樹正開
花此行便與塵凡隔何用秋乘八月槎

示冕

時予雙親在堂
留冕代養於杭

阿冕今年已十三耳邊垂髮綠髻髮好親燈火研經史

勤向庭闈奉旨甘銜命年年巡塞北思親夜夜夢江
南題詩寄汝非無意莫負青春取自慚

得外舅安豐董先生書

悠悠遠別幾經年極目江南思渺然客底正勞千里夢
天邊忽墮五雲箋得官自愧超遷早濟世深慚學術偏
瞻仰泰山應未遂馬蹄明日又翩翩

送中書舍人內弟董仲魯奉使親藩

奉使親藩屬俊才寧親此日遂歸來天涯游子十年

別堂上慈顏一笑開
北闕風雲新節鉞
西湖煙雨舊樓臺
癡兒相見應相問
好帶平安兩字來

輓兵部柴尚書

權兼將相竭忠誠
文武全才屬老成
廊廟雍容時望重
邊陲談笑戰塵清
白雞忽憶當年夢
青史應垂萬古名
嗟我忝居鄉曲後
謾歌楚些寄哀情

悼內六首

垂老光陰兩鬢皤
細君棄我竟如何
夫妻一旦世緣盡

兒女百年恩愛多
曉閣空懸臺上鏡
春衣誰試篋中羅
客邊聞計腸先斷
淚落西風鼓缶歌

世緣情愛總成空
二十餘年一夢中
疏廣未能辭漢主
孟光先已棄梁鴻
銓昏羅幔通宵雨
花謝雕闌暮地風
欲覓音容在何處
九原無路辨西東

縹緲音容何處尋
亂山重疊暮雲深
四千里外還家夢
二十年前結髮心
寂寞青燈形對影
蕭疎白髮淚沾襟
篋中空有遺書在
把玩不堪成古今

塵寰冥路兩茫茫何處青山認故鄉
破鏡已分鸞鳳影遺衣空帶麝蘭香
夢回孤館腸千結愁對殘燈淚萬行
抱痛苦嫌胸次窄也應無處著淒涼

東風庭院落花飛偕老齊眉願竟違
幻夢一番生與死訃音千里是耶非
淒涼懷抱幾時歇縹緲音容何處歸
魂斷九泉招不得客邊一日幾沾衣

房櫳寂寞掩春風百歲情緣一旦空
世態不離生歿內夢魂都在別離中
可憐孤館月華白猶憶香奩燭影紅

老眼昏昏數行淚客邊從此恨無窮

送顧克新南還

都門三月柳飛花把酒相看日未斜
充貢已看先得意承恩仍喜蚤還家
輕風細浪征帆穩芳草長亭客路賒
君去故園春尚好令人歸思滿天涯

春陰感懷

連日輕陰雨未成萬株煙柳暗春城
野花偏向愁邊發池草多從夢裏生
越水吳山頻引領沈腰潘鬢不勝情

何時歸去西湖路
載酒攜柑聽早鶯

重陽感懷

畫景如梭夜漏長
又驚節序是重陽
江楓點綴秋光好
籬菊包藏晚節香
多事未容陶令去
老懷難學孟嘉狂
蕭條孤館誰相問
獨對西風一舉觴

新年客懷

客底光陰似水流
又看五十五春秋
深慙一品三孤秩
敢望千金萬戶侯
輦路塵清殘雪在
御鑪香煖瑞煙浮

老來況味俱蕭索只有歸心不自由

暮秋感懷

重陽節後北風多景物蕭條可奈何
葉帶寒聲風外落雁隨霜信月中過
愁來萬事紛如結老去孤忠耿不磨
偷得浮生片時暇凭闌搔首且吟哦

元日述懷

錫宴歸來靜掩扉卧看初日轉斜暉
避喧不欲輪蹄駐得食從教鳥雀飛
遠道冰霜情脈脈故園梅柳思依依

新年祝願無他事惟乞皇恩早賜歸

王一寧學士哀輓

內相方承寵渥新那堪鵬鳥集承塵文章功業成千古
臺閣絲綸少一人慷慨誰論天下事淒涼空憶夢中身
向時談笑皆陳迹惟有臨風淚滿巾

直廬歲暮

直廬蕭索度殘年靜夜焚香思悄然市遠不知沽酒價
庭空惟見煮茶煙風穿疎牖銀燈暗月轉高城玉漏傳

歸興漸隨生意動，昨宵清夢繞林泉。

送知縣莫文淵致仕歸錢塘

解組還鄉未白頭，身安意適復何求。
六橋有路閒來往，萬事無心任去留。
闔境吏民思舊澤，入門兒女具新篋。
明朝我亦休官去，同向西湖理釣舟。

送江用亨下第

賈生年少負奇才，射策無成又獨回。
威鳳不隨凡鳥語，好花偏向暮春開。
都門煙樹關情遠，故國湖山入夢來。

浪暖桃香三載後禹門還聽一聲雷

和何知州交趾次節韻

凜凜英風震百蠻巍巍砥柱屹狂瀾自緣忠義存心正
不惜從容就死難瘴海雲迷歸路遠邊城月照旅魂單
衣間別有文山句千載令人拭淚看

秋閨二首

附錄

散步瑤階下庭空不見人回頭顧明月惟有影隨身

其二

莫向池邊去芙蓉花正開近來憔悴甚應是被風猜

七夕二首

亡妻忌辰

夜靜銀河冷天高玉露清雙星緣底事千古若為情

其二

華月窗間過涼風扇底生撫時追往事幽恨不分明

送道士史志中

不駕青牛西出關却乘畫鷁向南還枕中鴻寶千金秘
袖裏龍光一劍閒潞水蘄門分別處岸花檣燕送留間

蓬萊到日春將老想見碧桃開滿山

七言絕句

豫讓橋懷古

豫讓橋邊策馬過當年意氣未消磨人臣報主宜如此
歟不成功可奈何

平陽道中

楊柳陰濃水鳥啼豆花初放麥苗齊相逢盡道今年好
四月平陽米價低

列石輓竇鳴犢

列國難逢世主賢孤忠非命亦堪憐
臨河不返宣尼轍未必聲名萬古傳

曉發太原

鳴騶擁道出邊城月澹星疎騎火明
驛路經行三十里漏聲猶自報殘更

過汜水觀曾典史所種樹感懷一絕

化洽民心久未忘路旁嘉樹比甘棠
我來憇馬清陰下

淚洒薰風一斷腸

過滎陽

鴻溝迢遞接滎陽
芳草瀟瀟漫古戰場
說盡興亡無限事
數聲啼鳥在垂楊

過汜水

清汜垂虹貫濁流
峻崖虎踞瞰中州
山河不盡登臨興
兩襲春風獨倚樓

橫望巡檢司

在太行之中

獨倚危譙拭遠眸青山環合白雲浮
孤標中斷分南北
半是覃懷半澤州

讀王荊公趙清獻公文集

新法殃民衆欲除金陵強辨欲何如
等閒一語鋒鋞折
稷契當年豈讀書

暮春遇雨

暖風吹雨浥輕塵滿地飛花斷送春
莫上高樓凝望眼
天涯芳草正愁人

村舍桃花

野水縈紆石逕斜
華門蓬戶兩三家
短牆不解遮春意
露出緋桃半樹花

夜坐

朦朧淡月映窗紗
坐聽嚴城動鼓笳
自是歸期難准信
生憎銀燭又開花

題孟浩然踏雪尋梅

滿頭風雪路欹斜
杖屨行尋賣酒家
萬里溪山同一色

不知何處是梅花

夢中作

青鸞穩駕紫雲車
天上歸來月欲斜
吹斷玉笙人去遠
瑤池開遍碧桃花

除夜宿太原寒甚

寄語陽和及蚤來
何須堤柳與江梅
五更月落天雞唱
更有城頭畫角催

元日寓太原分司獨坐感懷

客中況味似枯禪歲月無情任轉遷不是五更聞爆竹
那知今日是新年

太原縣元日即事

青袍縣吏候庭叅慶罷新正酒半酣不道并州倦遊客
夢回枕上憶江南

凭闌

晚晴公館有餘閒獨上危樓望遠山散盡白雲收盡雨
歸鴉背得夕陽還

潮燈花鵲噪

鵲噪燈花亦偶然人間喜信只虛傳
朝朝暮暮知多少悞却歸期又隔年

小樓春望

小樓十二曲闌杆曲曲闌杆見遠山
望盡夕陽芳草色天涯遊子幾時還

殘春漫書

借問春歸何處所天涯芳草路茫茫
楊花不解留春住

空逐東風上下狂

讀叅同契有感

蓬島瀛洲事渺茫
嬰兒姪女竟分張
仙凡自古雲泥隔
空讀人間不滅方

宋宮

龍樓高處彩雲飛
艮岳纔成事已非
寂寂長門金鎖合
中州無復二龍歸

七夕

鵲橋千丈跨銀河夜靜風恬水不波
牛女相逢又相失
歡情不似別情多

鴈字

界破青天印碧波分明點畫與波戈
右軍不識其中意
却把黃庭換白鷺

雨中山行

濕雲拖雨過前山遠樹冥冥煙霧間
碎石亂流人不渡
晚來惟有一僧還

春歸

紅芳老盡綠陰肥到處楊花作雪飛
塞北從來無杜宇不知何物動春歸

山行駐馬

沾衣數點雨餘雨極目萬重山
外山立馬平原看秋色獨憐寒菊
映衰顏

上太行山

西風落日草班班雲薄秋空鳥獨還
兩鬢霜華千里客

馬蹄又上太行山

春寒喜和暖

東風消盡山頭雪和氣挽回天下春
笑殺堤邊千樹柳纔舒青眼便窺人

臘月二十四夜口號

金鑪銀燭夜生春爆竹聲催節候新
自笑中年強隨俗買錫裂紙祀厨神

十七夜燈

一盃濁酒送殘燈歲月無情感慨增垂老漸忘兒女態
從教客況似山僧

讀悟真篇

金丹元只在紅塵混俗方能得至真自是書生守名節
莫慚辜負指迷人

春曉

曉風吹月下長空漸覺東窗日影紅寄語鄰雞莫驚覺
家山正在夢魂中

蚤春即景

弱柳千條拂地垂
向陽亭館日遲遲
杏花寂得春光蚤
屋角斜橫四五枝

春日寫懷

賞心樂事久蹉跎
景物關情奈爾何
獨上高樓望鄉國
一川芳草夕陽多

暮春小雨

霏霏小雨不沾衣
細逐斜風密又稀
好濕香塵沾柳絮

莫教零亂送春歸

貪睡

氣昏無奈困人天
纔說看書便欲眠
分付家童添活火
莫教斷却煮茶煙

宿徐溝

霜臺寂寂夜無譁
遠近邊城動鼓笳
客路瀰漫歸思遠
絳臺銀燭謾開花

登太行思親

馬足車塵不暫間
一年兩度太行山
庭闈縹緲孤雲下
遊子思親幾日還

黃河舟中

順風催浪片帆輕
頃刻奔馳十數程
舵尾炊煙猶未熟
船頭已見汴梁城

又

天風吹我渡黃河
鼓枻中流發棹歌
昨夜一番甘雨降
魚龍無數沐恩波

夏日憶西湖風景

湧金門外柳如煙
西子湖頭水拍天
玉腕羅裙雙蕩槳
鴛鴦飛近採蓮船

野景

千山萬山白雲起
三片五片紅葉飛
野寺蕭條門半掩
夕陽滿地一僧歸

汝寧懷古

即古蔡州

鷺鴨池荒蔓草生
沙河如帶繞孤城
平淮事業誰能繼

撫景令人恨不平

題光武扳倒井

在裕州北四十里

天相中興不偶然等閒平地湧清泉
靈源千古蛟龍蟄時出人間救旱年

過南陽輓孔明

三面英雄正角持孤臣生死繫安危
大星不向營前墜混一寰區未可知

過彭祖店

在烏陵縣北二十里

年垂八百竟如何終見浮生逐逝波
服御無人傳秘訣
道傷高塚謾嵯峨

雪晴

日照九遠銀路直天開四面玉樓寒
無邊景物誰收拾
分付詩人獨倚欄

曉起感懷

鐘聲驚散樹頭鴉窗戶微明月影斜
鏡裏衰顏隨節換
數莖白髮映烏紗

無題

莫向東風折柳枝
柳枝纔折便興思
紅塵鞍馬紅亭路
却似當年送別時

春日野景

柳條纔老杏花繁
紅綠參差出短垣
野犬數聲迎客吠
屋頭風細酒旗翻

自嘆

紅塵蹤跡厭驅馳
况復年來兩鬢絲
擾擾太行南北路

不知何日是歸期

宿仁義驛

公館蕭條野水邊
山深地僻少人煙
窗風吹夢不成寐
獨擁青綾思悄然

清源分司林檎花

龍蔥一樹玉生香
半露晴梢出短牆
冷淡不關蜂蝶夢
可能無語怨韶光

顧生葵菴卷

南薰薦爽入瑤琴戶外栽葵錦作林不是貪看好顏色
祇憐一點向陽心

題畫菜

青紫均沾雨露恩一團生意淡中存食前方丈倘來物
大節還須咬菜根

春圃生意圖

膏粱難近腹中書賴有羣蔬薦客廚不獨澹然忘世味
更存生意滿寰區

棲霞亭卷二首

丹成隨處是仙家何必蟠桃萬樹花
疊膝茅亭心似水流光滿目絢丹霞

餐霞服日總虛傳識得棲真始是仙
獨擁蒲團亭上坐凝神遙在五雲邊

題蒲萄圖

一夜轟雷震九垓明珠幻出老龍腮
摘來釀酒三千斛獻作吾皇萬壽杯

題畫

負重那堪路更賒
行行未得到山家
老妻稚子應相望
回首柴門日欲斜

孤雲

孤雲出岫本無心
頃刻翻成萬里陰
大地蒼生被甘澤
成功依舊入山林

張燈偶題

客中無計可消愁
隨俗張燈向小樓
月自團圓燈自好

老懷不似舊風流

并州元夕

滿城燈火走兒童萬朶金蓮照地紅
獨有并州倦遊客夢魂飛繞鳳城東

并州初春寫景

塞上尋春不見春
邊風日日走紅塵
多情只有庭前柳
微弄腰肢慰藉人

初春睡起寫景

雪消土潤草痕青
烟暖風柔柳帶輕
啼鳥一聲來枕上
夢回春意滿山城

暮春客途即景

雨中紅綻桃千樹
風外青搖柳萬條
借問春光誰管領
一雙蝴蝶過溪橋

擬吳儂曲三首

憶郎直憶到如今
誰料恩深怨亦深
刻木為雞啼不得
元來有口却無心

憶郎憶到骨如柴
夜夜望郎郎不來
乍喫黃連心裏苦
花椒麻住口難開

儂在西邊郎在東
深堂宅院幾重重
浮麥磨來難見面
厚紙糊窗不漏風

淵明像

杖屨逍遙五柳莊
一辭獨擅晉文章
黃花本是無情物
也共先生晚節香

忠肅集卷十一